



Unioni de is Comunas de su Partiolla e de su Campidano de Bàsciu

Progetu “Sa Lingua Sarda 2”, Avisu TuLIS - Annualidadi 2023



Comunu de Barrabi



Comunu de Patiolla/Sici



Comunu de Donori



Comunu de Serdiana



Comunu de Sètimu



Comunu de Solèminis



Regioni Autònoma de Sardigna - Lei 482/99 e L.R. 22/2018



Comunu de Serdiana

Stòria e testimòngius de su passau



Non si tenint novas craras a pitzu de s'òrigini stòriga de sa bidda de Serdiana, is ipòtesis chi faint si fundant a pitzu de s'agatadura de materiali archeològicu meda in s'interis de traballus de massajus.

In su sartu ant agatau trastus de perda chi testimòngiant is primus aposentamentus neoliticus. Cussus scorròvonus e totu, fatus a canta de sa cresiedda de sartu de **Santa Maria de Sibiola**, aundi iant agatau ainas de perda e atrus ogetus, ant cunfirmau sa presèntzia umana giai de su tempus preistòricu, e in su tempus nuraxesu, in su tempus fenìcio-pùnicu puru, e a pustis po totu su tempus romanu.

Cumintzendi de su sèculi XI Serdiana fiat parti de su giudicau de Casteddu, a intru de sa **Curadoria de Dòlia o Parte Olla**, passendi a is contis della Gherardesca. A pustis de su **1257** su Giudicau dd'iant spèrdiu e dd'iant aciuntu a su Rennu de Arborea, chi a pustis iant donau che fèudo a is Bollaix finsas a su **1297**, annu chi dd'ant donau a su comunu de Pisa.

In un'arregistru pisanu antigu, de is primus annus de su Trexentus, agataus Serdiana, chi in cussu tempus ddi narant “Villa Sidriani”: de is datus arregòllius parit chi fessat una biddixedda pitica chi dònna annu donaiat



una cuota a su Comunu de Pisa de ses libras in dinai, dexi soddus po is deretus de fai binu, 54 stareddus de trigu e 42 de orxu (*). In su **1323** Serdiana fiat passada a is Aragonesus, chi iant assutau sa Sardigna lassendi intreu su giudicau de Arborea ebbia. Su territòriu conchistau dd'iant pratziu in fèudus. Serdiana, paris cun is atras biddixeddas de Ùssana, Siserri, Turrìs, Bacu e Jana e atras biddixeddas spèrdias o sbuidas, fiat passada, in su 1328, a su nòbbili Clemente Salavert.

Candu in su **1358** is aragonesus iant fatu su censimentu de is fèudus insoru, Serdiana fiat unu possedimentu de R. de Monphao o Raimondo de Mont Pavon, chi is bividori ndi donaiant una cuota chi fiat aguali a sa tassa donada a innantis a su Comunu de Pisa.

Parit chi in cussu tempus Serdiana fiat spopolada totu pustis de sa pesta e po is strobis ocasionaus de fàmìni e gherras.

In su **1440** dd'iant passada a is Tomich e cun su nòmìni de Sardiani ndi contaiant 26 fogus (est a nai famillias). Fiat propiedadi de is Mora in su **1544**, e dexi annus a pustis, de is Gaspari-Porcella. A pustis fiat passada a is Fortesa.

In su **1678** dda bieus cuncordada che “Baronia de Sardiani”, cun 114 fogus. In su **1728** sa Baronia dd'iant pratzia in duus Marchesaus: su Marchesau de San Xavier o Saverio, cun Serdiana e Donori, e su Marchesau de Sant'Esperate.

S'ùrtimu feudatàriu de Serdiana est stètia sa marchesa Donna Giovanna Carcassona Brunengo. Po su riscatu de su marchesau , su Comunu iat pagau Liras sardas 3.388.

Po cussu chi pertocat s'orìgini de su nòmìni, is studiosus no funt de acòrdiu. Ddoi est chini pensat chi bèngiat de s'arrèxini fenìcia “*SARED*” chi bolit nai “arrùbiu”, de su colori de is argiddas chi ddoi funt in su logu, ddoi funt atrus chi narant chi su topònimu antigu potzat benni de “Sergius” unu “cives” patritziu romanu arricu meda , chi is possedimentus agrìculus suos iant a àiri donau cumintzu a su primu nùcleu chi a pustis si fiat amanniau cun su nòmìni de “*Sergiana*”.

(*) R. Solinas “*Feste e sagre del Parteolla*”